

瑜伽師地論本地分菩薩地真實義品講義九(2012)

一、六種成熟〔瑜伽卷37，成熟品；經過整理〕

云何成熟？當知成熟略有六種：一者、成熟自性，二者、所成熟補特伽羅，三者、成熟差別，四者、成熟方便，五者、能成熟補特伽羅，六者、已成熟補特伽羅相。

- 云何成熟自性？謂由有善法種子及數習諸善法故，獲得能順二障斷淨增上身心，有堪任性、極調善性，正加行滿。安住於此，若遇大師不遇大師，皆有堪任、有大勢力，無間能證煩惱障斷、所知障斷。

譬如癱瘓，熟至究竟，無間可破，說名為熟。又如瓦器，熟至究竟，無間可用，說名為熟。又如眾果，熟至究竟，無間可噉，說名為熟。

如是由有善法種子及數修習諸善法故，獲得能順，廣說乃至正加行滿，無間能證二障清淨，說名成熟。如是名為成熟自性。

- 云何所成熟補特伽羅？謂所成熟補特伽羅略有四種。

一者、住聲聞種姓，於聲聞乘應可成熟補特伽羅。

二者、住獨覺種姓，於獨覺乘應可成熟補特伽羅。

三者、住佛種姓，於無上乘應可成熟補特伽羅。

四者、住無種姓，於往善趣應可成熟補特伽羅。

諸佛菩薩於此四事，應當成熟如是四種補特伽羅。是名所成熟補特伽羅。

住無種姓補特伽羅，於往善趣而成熟時，有數退轉，有數應作。安住種姓補特伽羅，於往三乘而成熟時，無數退轉，無數應作。

- 云何成熟差別？謂此差別略有六種。

一、諸根成熟：謂八種異熟具足。〔瑜伽卷36；經過整理〕

1. 壽量具足：若諸菩薩長壽久住，是名菩薩壽量具足。

壽量具足因：諸菩薩於諸眾生不加傷害，遠離一切傷害意樂。

壽量具足果：諸菩薩壽量具足故，能於長時修習善品，依自他利，積集增長無量善根。

2. 形色具足：形色端嚴，眾所樂見，顏容殊妙，是名菩薩形色具足。

形色具足因：惠施光明鮮淨衣物。

形色具足果：若諸菩薩形色具足故，大眾愛樂；眾愛樂故，咸共歸仰。如是形色可愛樂故，一切大眾咸歸仰故，凡所發言無不聽用。

3. 族姓具足：生豪貴家，是名菩薩族姓具足。

族姓具足因：於諸眾生捨離憍慢。

族姓具足果：若諸菩薩族姓具足故，大眾尊敬、供養、稱讚。眾所尊敬、供養、稱讚故，於彼彼事，勸諸眾生精勤修學，無不敬用，速疾修行，無違無犯。

4. 自在具足：得大財位，有大朋翼，具大僚屬。是名菩薩自在具足。

自在具足因：於資生具有所匱乏遊行乞丐、諸眾生所，隨欲惠施。

自在具足果：若諸菩薩自在具足故，能以布施，攝諸眾生，速令成熟。

5. 信言具足：眾所信奉斷訟取則，不行諂誑偽斗秤等，所受寄物終不差違，於諸有情言無虛妄。以是緣故，凡有所說，無不信受。是名菩薩信言具足。

信言具足因：所言誠諦，亦不好習乖離麤獷不相應語。

信言具足果：若諸菩薩信言具足故，能以愛語、利行、同事，攝諸眾生，速令成熟。

6. 大勢具足：有大名稱，流聞世間；所謂具足勇健、精進、剛毅、敏捷、審悉、善戒。種種伎藝，工巧業處，展轉妙解出過餘人。由此因緣，世所珍敬，為諸大眾供養、恭敬、尊重、讚歎。是名菩薩大勢具足。

大勢具足因：攝持當來種種功德於自身中；發弘誓願，供養三寶及諸尊長。

大勢具足果：若諸菩薩大勢具足故，於諸眾生種種事業，皆能營助，施布恩德。由此恩德感眾生心，彼知恩故咸來歸仰。所出言教，速疾隨轉，恭敬信用。

7. 人性具足：具丈夫分，成就男根，是名菩薩人性具足。

人性具足因：樂丈夫體，厭婦女身，深見過患。由二因緣，施他人性。一者、女人樂女身者，勸令厭離，解脫女身。二者、丈夫將失男根，方便護攝，令不失壞；及說正法，令得男身。

人性具足果：若諸菩薩人性具足故，成就男根，堪為一切勝功德器。能於一切所作事業，思擇一切所知境界，都無所畏，無礙而行。一切有情於一切時，皆來臻赴同共集會；屏處露處，言論同止，受用飲食，皆無嫌礙。

8. 大力具足：為性少疾或全無病，有大堪能，是名菩薩大力具足。

大力具足因：於諸眾生以身供事，隨其所作如法事業，皆往營助。如己力能，以其正法，不以卒暴。用能增長身心勢力，餅飯糜等種種飲食，施諸眾生。

大力具足果：若諸菩薩大力具足故，於能引攝善法加行及能饒益有情加行，皆無厭倦；勇猛精進、堅固精進，速證通慧。

此依身果異熟具足為所依故，堪任發起勇猛精進修諸善法，於勤修集一切明處，心無厭倦。

當知諸根成熟故解脫異熟障。

二、善根成熟：謂性薄塵垢為所依止；性於諸惡不善法中，心不樂入，諸蓋輕微，尋思薄弱，柔和正直，隨順而取。

善根成熟故能解脫業障。

三、智慧成熟：謂具足正念，為性聰敏，有所堪任，有大勢力，能解善說惡

說法義，能受能持，能正通達，具足成熟俱生妙慧；依此妙慧，有所堪任，有大勢力，能令其心究竟解脫一切煩惱。

智慧成熟故解脫煩惱障。

四、下品成熟：謂二因緣，下品成熟。一者、未久修習諸根、善根、智慧成熟因緣，未極增長。二者、串習下劣因緣。

五、中品成熟：謂即於此二種因緣，隨一闕減，隨一具足。

六、上品成熟：謂二因緣俱無闕減。

●云何成熟方便？當知此有二十七種。

一者、界增長者：謂本性善法種子具足為所依止，先來串習諸善法故，後後位中善法種子，轉增轉勝，生起堅住，是名界增長。

二者、現緣攝受者：謂於現法中，無倒說法，無倒受持，如理修行，法隨法行。當知界增長，由先世因，現在成熟；現緣攝受，由現在因，現在成熟。

三者、趣入者：謂得淨信增上力故，或有在家，遠離惡行，受持學處；或趣非家，遠離諸欲，受持學處。

四者、攝樂者：謂依出離眾苦行迹，及依遠離欲樂自苦二邊行迹，於佛善說法毘奈耶真實聖教，深生愛樂。

五者、初發處者：謂即最初於可厭法，深生厭離；於能成辦真實理義，如實了知有勝功德，而創趣入，名初發處。

六者、非初發處者：謂已趣入補特伽羅現成熟時，常不捨離諸佛菩薩，諸明了處，轉轉明了。由此成熟，轉轉增進。

七者、遠清淨者：謂由懈怠或由違緣，經極長時，或經多生，或經多劫，方能清淨。

八者、近清淨者：當知一切，與此相違。

- 九者、加行者：謂為獲得自勝義利，猛利樂欲為所依故；或怖當來墮諸惡趣，或怖現法他所譏毀，於諸學處，常勤護持；無間所作，殷重所作。
- 十者、意樂者：謂於諸法正觀察忍為所依故；於佛善說法毘奈耶，不可引奪，於他所證，深生信解。信有功德為所依故；於三寶所，及於獲得自義利所，深信無動。
- 十一者、財攝受者：謂於一切飲食等物有匱乏者，施與一切飲食等物；或於隨順飲食等物有匱乏者，施與隨順飲食等物。
- 十二者、法攝受者：謂或宣說正法，施諸有情；或開顯正義，施諸有情。
- 十三者、神通引攝者：謂具神通者，哀愍有情故，或為有情意樂清淨，或為有情加行清淨增上力故，示現種種神通變化。欲令有情見已聞已，於佛聖教，或當獲得意樂清淨，或當修行無倒加行。彼諸有情，由此神變引攝心故，或有獲得意樂清淨，或有修行無倒加行。
- 十四者、宣說正法者：謂於獲得自勝義利；若無堪能，為說正法，伴助令彼發生正行。若有堪能，為說正法，隨順令彼速證通慧。
- 十五者、隱密說法者：謂於嬰兒智慧有情，隱覆廣大甚深義法，為說麤淺易可悟入，易為方便，趣入處法。
- 十六者、顯了說法者：謂於廣大智慧有情，已善悟入聖教理者，為其開示廣大甚深道理處法。
- 十七者、下品加行者：謂若遠離無間加行，及殷重加行。
- 十八者、中品加行者：謂或遠離無間加行，或復遠離殷重加行。於二加行，隨闕一種。
- 十九者、上品加行者：謂無間加行，及殷重加行，二俱相應。
- 二十者、聽聞者：謂於佛語深生信解，精勤聽聞、受持、讀誦契經等法。
- 二十一者、思惟者：謂居遠離，樂思惟法，推度其義，解了決定。

二十二者、修習者：謂於止舉捨相，正審觀察為先，深心欣樂修正舉捨。

二十三者、攝受者：謂無染心，以親教師及軌範師，道理方便，無有顛倒，與作依止。又即於彼發起種種別供事行：謂看病行，給施如法衣服、飲食、諸坐臥具、病緣醫藥、資生具行，除遣憂愁及惡作行，除遣煩惱隨煩惱行，如是等類，當知皆名別供事行。

二十四者、降伏者：謂深防護自身雜染，於毀犯者若犯下品，慈心諫誨；若犯中品，慈心訶罰；若犯上品，慈心驅擯。當知此中諫誨、訶罰，令彼及餘利益安樂；驅擯一種，若重攝受，令彼及餘利益安樂；若驅擯已，不重攝受，但令其餘利益安樂。何以故？餘若見彼毀犯因緣，既被驅擯，便自防護，不起毀犯故。

二十五者、自成熟者：謂自宣說隨順正法，令諸有情，出不善處安立善處。如自所說，亦自修行法隨法行，令諸有情同分隨轉。勿使他人作如是說：汝自不能出不善處安立善處，云何於他教授、諫舉、為作憶念？他應於汝教授、諫舉、為作憶念。

二十六者、請他成熟者：謂若有餘無量有情，於彼發起上品愛敬；或復有餘，善知方便，於說正法已善修學；即應勸請慇懃營助，令其成熟無量有情。

二十七者、俱成熟者：謂具二種；若自成熟，若勸請他，令其成熟。

由此所說二十七種成熟方便，當知令前六種成熟差別圓滿；所謂諸根成熟、善根成熟、智慧成熟、下品成熟、中品成熟、上品成熟。

●云何能成熟補特伽羅？謂略有六種菩薩，住菩薩六地能成熟有情。

一者、勝解行菩薩住勝解行地。

二者、淨勝意樂菩薩住淨勝意樂地。

三者、行正行菩薩住行正行地。

四者、墮決定菩薩住墮決定地。

五者、決定行正行菩薩住決定行正行地。

六者、到究竟菩薩住到究竟地。

●云何已成熟補特伽羅相？

聲聞：謂諸聲聞先已串習諸善法故；

若時安住下品成熟，爾時便有以下品欲樂，下品加行，猶往惡趣。非於現法證沙門果，非於現法得般涅槃。

若時安住中品成熟，爾時便有以下品欲樂，中品加行，不往惡趣。於現法中證沙門果，非於現法得般涅槃。

若時安住上品成熟，爾時便有以下品欲樂，上品加行，不往惡趣。於現法中證沙門果，即於現法得般涅槃。

獨覺：如說聲聞，獨覺亦爾。何以故？道與聲聞同種類故。而此獨覺與諸聲聞有差別者，謂住最後有最後所得身，無軌範師，宿習力故，修三十七菩提分法，究竟斷滅一切煩惱，證阿羅漢，故名獨覺。

菩薩：若諸菩薩，住勝解行地，名下品成熟。住淨勝意樂地，名中品成熟。住墮決定到究竟地，名上品成熟。

若時菩薩住下品成熟，爾時便有以下品欲樂，下品加行，猶往惡趣。此盡第一無數劫邊際，熾然無動，極善清淨覺品善法，當知一切皆未相應。

若時菩薩住中品成熟，爾時便有以下品欲樂，中品加行，不往惡趣。此盡第二無數劫邊際，熾然無動，覺品善法，已得相應；極善清淨覺品善法，未得相應。

若時菩薩住上品成熟，爾時便有以下品欲樂，上品加行，不往惡趣。此盡第三無數劫邊際，熾然無動，極善清淨覺品善法，當知一切皆悉成

就。今於此中，性淳厚故，極猛盛故，能有上品廣大果故，大勝利故，名為熾然。不轉還故，不退墮故，常勝進故，名為無動。菩薩地中，最無上故。當知說名極善清淨。

當知此中，若財攝受所作成熟、若神通引攝所作成熟、若隱密說法所作成熟、若下品加行所作成熟、若唯聽聞所作成熟，如是五種所作成熟，若於長時修習彼法，尚為下品，況於少時修習彼法。

其餘一切成熟因緣所作成熟，當知皆有三品道理；謂若於彼下品修習，成下成熟；中品修習，成中成熟；上品修習，成上成熟。此下中上三品成熟，當知一一復有三品。於下品中，有下下、下中、下上三品成熟；於中品中，有中下、中中、中上三品成熟；於上品中，有上下、上中、上上三品成熟。如是等類，諸佛菩薩成熟有情，當知展轉差別道理，有無量品。

此中菩薩，由前所說成熟因緣，為欲成熟自佛法故，精勤修集諸根成熟、善根成熟、智慧成熟、下品成熟、中品成熟、上品成熟。又欲令他諸有情類補特伽羅，乘三乘法而出離故，往善趣故，修集如是六種成熟。